

# Kristo Anawaadilisha Wanadamu

*Maana yeye atakasaye na hao wanaotakaswa wote pia watoka kwa mmoja. Kwa ajili hii haoni haya kuwaita ndugu zake.—Waebrania 2:11.*

**Y**esu “haoni haya kuwaita ndugu zake.” (Ebr. 2:11); Yeye ndiye Dhabihu yetu, Mwombezi wetu, Ndugu yetu aliye katika mfano, wa kibinadamu mbele ya kiti cha enzi cha Baba, na katika milele zote atakuwa pamoja na jamii aliyoikomboa Yeye ndiye Mwana wa Adamu. Alifanya hayo yote ili mwanadamu anyanyuliwe kutoka katika uangamivu na hali mbaya ya dhambi, ili kwamba aakisi upendo wa Mungu na kushiriki furaha ya utakatifu.

Bei iliyolipwa kwa ajili ya ukombozi wetu na kafara isiyo na kikomo ya Baba yetu wa mbinguni kwa kumtoa Mwana Wake kufa kwa ajili yetu, inapaswa kutupatia mawazo bora ya kile tunachoweza kuwa kupitia Kristo. Kama vile mtume Yohana aliyevuviwa alipotazama urefu, kina na upana wa upendo wa Baba kwa jamii iliyokuwa inaangamia, alijazwa sifa pamoja na kicho, alishindwa kupata lugha inayofaa kuelezea ukubwa na wema wa upendo Wake alialika dunia itazame, naye Yohana alisema, “Tazameni ni pendo la namna gani alilotupa Baba kwamba tuitwe wana wa Mungu; na ndivyo tulivyo” 1 Yohana 3: 1.

Mungu amewaona wanadamu kuwa ni wenye thamani kubwa ya namna gani! Kwa kuanguka katika dhambi, wanadamu wakawa chini ya mamlaka ya Shetani. Kupitia imani katika dhabihu ya Kristo inayowapatanisha wana wa Adamu na kuwa wana wa Mungu. Kwa kutwaa asili ya mwanadamu, Kristo amemwinua mwanadamu. Wanadamu walioanguka wanawekwa mahali ambapo kupitia muunganiko na Kristo wanastahili kiukweli kuitwa wana wa Mungu.”

Upendo huo wa ajabu, hauwezi kulinganishwa na kitu chochote. Wana wa Mfalme aliye mbinguni! Ahadi ya thamani! Jambo lenye maana lifaalo kufikiriwa sana! Upendo usio na kifani, jinsi Mungu alivyopenda ulimwengu usiompanda! Wazo hilo lina nguvu inayotisha roho na kuleta akili chini ya utashi wa Mungu. Na jinsi tunavyozidi kuichunguza tabia ya Mungu, katika nuru ya msalaba, ndivyo zaidi tutakavyoona rehema, upole na msamaha vimechanganyika pamoja na haki na usawa, na kwa udhahiri kabisa tutatambua ushahidi wa upendo Wake usio na kikomo na huruma ya upole ipitayo ile ya mama kwa mtoto wake mkaidi (*Jipatie Amani Moyoni, uk. 9, 10*).

Moyo wa Mungu huwahurumia watoto Wake wa duniani na kuwapenda kwa upendo mkuu, hata kuliko mauti. Alipomtoa Mwanawe wa pekee kwa ajili yetu, Mungu alitoa mbingu yote katika zawadi moja. Maisha ya Mwokozi hapa duniani, kufa Kwake, maombezi Yake kwa ajili yetu, huduma ya malaika kwetu na utetezi wa Roho Mtakatifu, Baba Mungu ambaye hufanya kazi juu ya yote na katika yote, upendeleo usiokoma wa viumbe vya mbinguni, hao wote wanashughulika kwa ajili ya ukombozi wa mwanadamu.

Hebu tuitafakari dhabihu ya ajabu jinsi ilivyofanywa kwa ajili yetu! Imetupasa kufahamu kazi na bidii inayotendwa na mbingu katika kuwarejesha na kuwarudisha waliopotea nyumbani kwa Baba.... Hebu tujipatie uwezo unaotolewa kwa ajili yetu ili kwamba tubadilishwe kuwa katika Mfano Wake, na kurejeshwa katika ushirika na malaika wahudumu, pamoja na upatanifu katika ushirika wa Baba na Mwanawe (*Jipatie Amani Moyoni, uk. 14, 15*).